

## 1 Korin

<sup>1</sup> Aya Pol, Negur nē oroyam Kristus Jesus nē aposel wō auf nigin iweignan, neda turada Sostenes ado,

<sup>2</sup> Korin oun Negur nē sios ã bun, pas enei matotkeneik. ã Kristus Jesus bun fateuleĩ fen, fateul ubodōgouf nigin iweignein, are tamo kayau ganan fire firen difar fen, neda Odug Jesus Kristus, idi neid Odug ado neda Odug ĩ yana dalesedig anidi geid weim iweignein.

<sup>3</sup> Negur neda Tamada ado Odug Jesus Kristus neid wau ifenēya ado wau inosiya, ã bun ibodōf.

### *Pol Negur De Fiyen*

<sup>4</sup> Aya wededem ã nigin Negur de afiyēdig, ere nigin, yogon wau ifenēya Kristus Jesus bun ã ifenein. <sup>5</sup> Ere nigin, Jesus bunem ereb ereb ganan bun, ã kisi feleya ifenein, are āgenei wogō ganan ado keleĩ ganan bun, <sup>6</sup> ere nigin, Kristus nigin neda wogōya, ã bun megeir ifaren. <sup>7</sup> Anĩ nigin, ã neda Odug Jesus Kristus yaorouf nigin wauĩ fatuk unog fen, tarig mog, ã Awa Uur nē ege luwa taka to lau gef. <sup>8</sup> Jesus ã total irouyeik ile, idikeleya bun ilauf, anĩ bunem, neda Odug Jesus Kristus isiyouf nē naa bun, ã bouweĩ od sãf. <sup>9</sup> Negur ĩ, yogon Naal Jesus Kristus, neda Odug geid, ã nigal gouf nigin iweignein, ĩ ereb yef, de age fouf bagai.

### *Sios Atun Fara Fiya*

<sup>10</sup> Turau tar, aya neda Odug Jesus Kristus yana bunem total bagai arokeneik, are ã atun fara fiya taka to ibodōf nigin, ã ganan abob nigin wauĩ tekelei yen ken, ã wauĩ ado kisi tekelei bagai ubodōgouf. <sup>11</sup> Neu turau tar, tunĩ Kloe nē ibor bun tamal dirokanaan, are ã atun luwa irouya ibodok. <sup>12</sup> Aya enei wogō auf, are eig fiya, ã atun takam irok, “Aya

Pol dõ afef,” takam irok, “Aya Apolos dõ afef,” takam irok, “Aya Pita dõ afef,” takag irok, “Aya Kristus dõ afef.”

<sup>13</sup> Kristus ï fara furu fen de? Aya Pol ï, ã nigin aa tetek bun dun de? ã aya Pol yanau bunem naan digunein de? <sup>14</sup> Aya Negur de afiyek, are aya ã taka to naan agunen, Krispus ado Gaius dogol naan agunẽdin. <sup>15</sup> Anĩ nigin, taka nem to irõf, “Aya Pol yana nem naan agun.” <sup>16</sup> (Momoi, aya Stefanas nẽ ibor tareg naan agunẽdin, anĩ teten, takag naan agunen be anĩ, to kisi afef.) <sup>17</sup> Ere nigin, Kristus ï aya naan agunẽdiyof nigin to sur fiyan, anĩ ere, biya od wogõ auf nigin sur fiyan, are Kristus nẽ aa tetek nẽ megeir to yalelauf nigin, tamo nẽ kisi biya wogõya anĩ bunem sã.

*Kristus ï, Negur Nẽ Kisi Biya Ado Megeir*

<sup>18</sup> Jesus aa tetek bun laa fen ya od anĩ, idi inanakelediy-ouf anidi bun are neneya, anĩ ere, ada isennadaf bun, od are Negur nẽ megeir. <sup>19</sup> Ere nigin, Negur nẽ Itotoya bun eig ye irok:

“Aya tamo kisi biya adodo neid kisi biya daũ afalauf, aya tamo keleĩ odug adodo neid keleĩ alelauf.”\*

<sup>20</sup> Tamo kisi biya adodo nain? Tamo keleĩ odug adodo nain? Sain enei nẽ keleĩ yaleya nigin luwa irouya tamo nain? Negur ï tenebur enei nẽ kisi biya anĩ to neneya inon de? <sup>21</sup> Negur nẽ kisi biya bunem, tenebur tamo dogo neid kisi biya anim, Negur nigin to kelein, anĩ nigin, neneya od dedig anĩ wogõ taudig bunem, idi momoi def anidi isennẽdiya nigin, Negur wau al fen. <sup>22</sup> Juda idi memelik nẽ uris dilouf nigin dirõdig, Grik idi kisi biya anĩ dimirẽdig. <sup>23</sup> Anĩ ere, ada Kristus aa tetek bun dun anĩ wogõ taudig, od anĩ Juda idi bun, ye tũ fiya od, haiden idi bun, are neneya od, <sup>24</sup> anĩ ere, idi Juda ado Grik Negurem iweignẽdin anidi bun, Kristus ï Negur nẽ megeir, Negur

\* 1:19: Asaia 29:14

nē kisi biya. <sup>25</sup> Ere nigin, Negur nē neneya kisi are, tamo nē kisi biya wal fiya, Negur nē folo reya are, tamo nē megeir wal fiya.

<sup>26</sup> Turau tar, ã naig be fiya ufareg mog, ã iweignein anĩ kisi gouf. ã musei sam, tamo nē keleĩ bunem, kisi biya ado wowã gen. Musei sam total ado wowã gen. Musei sam yeneĩ ado wowã gen. <sup>27</sup> Anĩ ere, Negur kisi biya adodo mama ifenēdiyof nigin, tenebur enei nē neneya igirnēdin. Negur ĩ megeir adodo mama ifenēdiyof nigin, tenebur enei nē folo reya igirnēdin. <sup>28</sup> Negur ĩ tenebur enei nē yeneid sã sã, meleid irim lai difedig ado, ereb taka sã dedig anĩ igirnēdin, are ereb ado dedig anĩ, yana sa kalauf nigin age fen, <sup>29</sup> anĩ bunem, Negur mala bun, taka nem yogo yana to yalesauf. <sup>30</sup> Negur nigin ã Kristus Jesus bun ubodōgef, Jesus ĩ ada nigin Negur bunem kisi biya wō yen, are ada ĩ bunem madur bagai, fateul wowã tau fen, isennēya talen. <sup>31</sup> Anĩ nigin, Negur nē Itotoya bun eig ye irok, “Tamo ĩ yogo yana yalesef are, Odug ereb age fen anĩ nigin yana yalesauf.”†

## 2

<sup>1</sup> Turau tar, aya ã gein asi fen, Negur yaor afouf nigin wogō ayein sain bun, aya od biya odug nem be, kisi biya odug nem to wogō aun. <sup>2</sup> Ere nigin, aya ã geid tabodon sain, aya ereb ereb ganen wederou tu kel fen, Jesus Kristus ado, ĩ aa tetek bun laa fen anĩ dogol kisi afouf nigin kisi afokelen. <sup>3</sup> Sain aya ã gein asin, aya totalou sã, fatuk bagai kumĩ tererē aun. <sup>4</sup> Neu od ado neu wogōya, are kisi biya nē, wauĩ faleiya nē od bunem sã, Awa Uur nē megeir nē ifelnēya bunem, <sup>5</sup> are āgenei momoiya, tamo nē kisi biya bun to ibodōf, Negur nē megeir bun ibodōf nigin age afen.

---

† 1:31: Jeremaia 9:24

*Awa Uur Nē Kisi Biya*

<sup>6</sup> Ada kisi biya nē od atīya anidi atun wogō taudig, anī ere, kisi biya anī, are sain enei nē sã, sain enei nē uyu irouya, fau inanakelediyouf anidi neid sã. <sup>7</sup> Anī ere, ada, Negur nē waa kisi biya anī, wogō taudig, are iminēyan ibodok, teneub kare fiya sã mog Negur neda fula fiya medeīya nigin mogo igirin anī. <sup>8</sup> Sain enei nē uyu irouya takam, kisi biya anī to kelein. Idi kisi biya anī kelein are, idi fula fiya medeīya nē Odug aa tetek bun to dum. <sup>9</sup> Anī ere, Negur nē Itotoya eig ye irok kilei:

“Negur nigin waud laa fedig idi nigin Negur dodok fen anī,  
 malam taka to ilen,  
 weder takam to karī yen,  
 kisi takam to fokō yen.”\*

<sup>10</sup> Anī ere, Negur yogon Awa Uurem ada bun anī yaor fen.

Awa Uur ī ereb ereb ganan fai yeledig, Negur nē ereb ereb ilon bargaig fai yeledig. <sup>11</sup> Tamo atun aim, tamo taka nē kisi keleī? Are tamo anī nē uurem dogol keleī. Age fiya bagai, tamo takam Negur nē kisi keleī sã, Negur nē Awa Uurem dogol keleī. <sup>12</sup> Ada teneub enei nē uur to talen, anī ere, ada Awa Uur Negur bun tamal talen, are ereb Negur wau sã ifanadan anī, ada keleī youf nigin age tafen. <sup>13</sup> Ada enei anī wogō taudig, are tamo nē kisi biya bunem od difelnadan anī bunem sã, are od Awa Uurem ifelnadan anī bunem. Ada Awa Uur nē od bunem Awa Uur nē kisi wogō taudig. <sup>14</sup> Tamo Awa Uur sã ī, Negur nē Awa Uur bun tamal ereb isif anī to yale iroudig, ere nigin, yogon karīya bun, are neneya. Ī anī keleīya nigin kisi feleya sã, ere nigin, are Awa Uur adodom dogol es difedig. <sup>15</sup> Awa Uur ado tamo ī, ereb ereb ganan nigin es fedidig, anī ere, ī yogo taka nem to es fiyēf. <sup>16</sup> Negur nē Itotoya eig ye irok:  
 “Aim Odug nē kisi keleī ken,

---

\* 2:9: Asaia 64:4

ĩ faded fiyēf?”†

Anĩ ere, ada Kristus nē kisi ado.

### 3

#### *Sios Bun Fara Fiya*

<sup>1</sup> Turau tar, aya ã momoiya nigin atĩya gen to ayein, ã teneub enei nē dogol, ã Kristus bun momou gen ayein.

<sup>2</sup> Aya su afenein, saaf total anĩ to afenein, ere nigin, ã anĩ nigin to saika gen. Momoi, ã gamag fau to saika gef. <sup>3</sup> ã fau teneub enei nē dogol ubodōgef. ã atun, kiyeĩ ado luwa irouya ibodok, anĩ nigin, ã fau teneub enei nē sã de? ã teneub enei nē tamo gen to ago gef de? <sup>4</sup> Takam irok, “Aya Pol dō afef,” takam irok, “Aya Apolos dō afef,” ago gouf are, ã teneub enei nē tamo sã de?

<sup>5</sup> Agef ilauf are, Apolos ĩ ai? Pol ĩ ai? Amã Negur nē kabĩ tamo dogol, amã bunem ã momoi gen, are Odugem kabĩ morou morou ifanamam kilei. <sup>6</sup> Ayam faat atenē di, Apolosem naan fen, anĩ ere, Negurem odugouf nigin age fen. <sup>7</sup> Anĩ nigin, faat itenēya tamo ado naan fiya tamo are ege, anĩ ere, Negur ĩ yogo dogol odug, ere nigin, ĩ ereb odugouf nigin age fedig. <sup>8</sup> Faat itenēya tamo ado naan fiya tamo, idi karĩya tekelei ado. Negur idi mugu mugu kabĩ dalen kilei, mala solo ifenēdiyof. <sup>9</sup> Ere nigin, amã Negur nē kabĩ tura tar, ã Negur nē kabĩ akor, Negur nē fõ.

<sup>10</sup> Negur ĩ aya wau ifenēya ifanan anĩ bunem, aya fõ inoya keleĩ biya tamo gen, fõ inoya nigin gariya anon, age afe di, taka nem anĩ teten fõ inof. Anĩ ere, tamo mugu mugu el de, lo de fen, fõ dinouf nigin lo difalauf. <sup>11</sup> Ere nigin, fõ gariya inon, are Jesus Kristus, taka nem fõ gariya fire inoya kisi feleya sã. <sup>12</sup> Tamo takam fõ gariya enei teten, gol, silwa, meein moni odug, aa, yeye be, wit turu nem fõ inouf are, <sup>13</sup> yogon kabĩ naig be fiya are yaorouf,

---

† 2:16: Asaia 40:13

ere nigin, Kristus nē naa bun, anī lalan bun irusi inouf. Are yā ado wō ye di, yā anim tamo mugu mugu nē kabī nē kaū es fouf. <sup>14</sup> Ī ereb inon anī ifarlauf are, ĩ yogon mala solo yalouf. <sup>15</sup> Ī ereb inon anī isaikalauf are, ĩ agogon youf. Ī yogo Negurem kel yalouf, anī ere, ĩ yā malan tamal ulō yesiya tamo gen ibodōf.

<sup>16</sup> Ā aug are Negur nē tempel, Negur nē Awa Uur ā namein ibodōdig anī, ā to keleī de? <sup>17</sup> Taka ĩ Negur nē tempel daū fouf are, Negur ĩ tamo anī daūf irailauf, ere nigin, Negur nē tempel are fateul, are ā tempel anī.

<sup>18</sup> Ā aug to udegnēgouf. Āgenei taka ĩ, gama sain enei nē keleī bunem, aya kisi biya ado yef are, ĩ neneya wō youf bagai, are ĩ kisi biya ado wō youf nigin age fouf. <sup>19</sup> Ere nigin, Negur mala bun, teneub enei nē kisi biya are neneya. Negur nē Itotoya eig ye irok kilei, “Negur ĩ, kisi biya adodo tamo dogo neid keleī anim kor bun dilelel mog, gei fedidig,”\* <sup>20</sup> Negur nē Itotoya takag irok, “Odug ĩ keleī, kisi biya adodo tamo neid kisi, are ege.”† <sup>21</sup> Anī nigin, tamo yeneid to walesagauf! Ere nigin, ereb ereb ganan are āgenei, <sup>22</sup> Pol, Apolos, Pita, teneub enei, mata ibodōya, laa, gama be, dumen, ereb ereb ganan, are āgenei, <sup>23</sup> ā Kristus nē, Kristus ĩ Negur nē.

## 4

### *Kristus Nē* Aposel Tar

<sup>1</sup> Anī nigin, tamo idi, amā nigin, idi Kristus nē kabī tamo tar, Negur nē waa lo fiya nigin idi imeid bun inon de fen, kisi difouf. <sup>2</sup> Tamo idi ereb lo difouf nigin imeid bun inon anidi, dogo neid marau sigor dō difef dile, age difouf anī, marau orof. <sup>3</sup> Ā aya es wiyagef be, tamo nē kot bun es difiyaf, are aya to sii fiyaf. Momoi, aya yug nigineg to es

\* 3:19: Job 5:13 † 3:20: Sam 94:11

afedig. <sup>4</sup> Neu kisi are karētut, anī ere, anim aya mosor sã to auf. Odug im aya es fiyaf. <sup>5</sup> Anī nigin, es fiya nē sain fau wōya sã mog, to es gouf. Tari gef uleg, Odug isiyouf bun. Ī ereb gugum bun iminek anī lalan bun irou isi fen, tamo neid waud bun kisi ibodok anī yaor fouf. Sain anī bun, idi mugu mugu Negur bun yana odug dalouf.

<sup>6</sup> Turau tar, gama aya, āgenei biya fiya nigin, ereb enei arokenein, aya yug ado Apolos bunem, afelnein, anī bunem, ā wogōya eig fiya nē gariya, are amã bun keleī walougouf, “Itotoya bun yenek anī to ufodulagauf.” Ā anī keleī youf are, ā tamo taka anī yana waleseg fen, taka to lai gouf. <sup>7</sup> Ere nigin, aim õ, taka wal fiya inenok? Õ mogo ado, ere anī õ to walen? Õ mogo anī walen ouf are, ere nigin õ anī to walen gen, ogo yanã walesef?

<sup>8</sup> Ereb ā oroyeik ganan ā mogo ado. Ā mogo safina kisi feleya bagai ubodōgef. Ā mogo king wowã gen, are amã geid sã. Amã ā geid king wowã tauf nigin, ā momoi bagai king wowã gem anī, aya orouf bagai. <sup>9</sup> Ere nigin, aya kisi afef, Negur ĩ amã aposel, tamo yukesiya nigin dinenēdig gen, tamo dilouf nigin, gī bun idikeleyan bagai inenaman. Saa teneub ado, are tamo ado engel meleid bun, amã fele difamãf nigin inoman. <sup>10</sup> Amã Kristus nigin neneya mabodok, anī ere, ā Kristus bun kisi biya bagai ubodōgef. Amã total sã mabodok, anī ere, ā total ubodōgef. Ā yeneī dalesedig, amã yanamã to dalesedig. <sup>11</sup> Kulu nem isi gama sain enei bun, amã naū ado naan ail mayok, amã gabar masasak mafilaik, amã darau difanamak, amã fō sã. <sup>12</sup> Amã mug imamam kabī total maledig. Sain amã disisnamak are, amã el fiya mafenēdidig. Amã darau difanamak are, darau anī faali mafedig. <sup>13</sup> Bouwamã bun od duk sain, amã molol nem od solo mafedig. Mabodok masi gama sain enei bun, amã teneub enei nē ido gen ado, ereb ereb ganan nē moto gen wō maun.

<sup>14</sup> Aya ã mama ifeneĩya nigin enei to atotof, anĩ ere, ã neu kesu tar oboiyou gen wedereĩ arouf nigin age afef. <sup>15</sup> Ere nigin, Kristus bun, ã ten tausen kulat tamo ado, anĩ ere, ã temeĩ musei sã, are aya Kristus Jesus bun biya od bunem temeĩ wõ aun. <sup>16</sup> Anĩ nigin, aya ã madẽ wiyagauf nigin totol bagai arokeneik. <sup>17</sup> Gariya enei nigin, aya neu kesu Timoti, ĩ Odug bun aya oboiyou ado dô fiya biya, ã gein sur afef. Im Kristus Jesus bun, neu mata ibodõya nẽ suma anĩ, ã wedereĩ fokõ foun, are aya modou ganan sios ganan bun afelnẽdidig age fiya bagai.

<sup>18</sup> ã tunĩ, Pol ĩ amã garan to isiyouf ge fen, ã aug yeneĩ walesegen. <sup>19</sup> Anĩ ere, Odug orouf are, aya kaisã bagai ã gein asiyouf, age afe fen, aya dogo yeneid yaleseya tamo eneidi naig de wogõ def anĩ sã, anĩ ere, ereb megeir idi ado anĩ fele afouf. <sup>20</sup> Ere nigin, Negur nẽ tano are ege wogõya nẽ sã, are megeir nẽ. <sup>21</sup> Ere anĩ ã oroyeik? Aya wagagã yeĩya nigin tibog ado ã gein asiyouf de, wau laa fiya ado molol bunem asiyouf?

## 5

### *Tureĩ Noli Tobonunã Ado Walelnẽgouf!*

<sup>1</sup> ã atun, noli tobonunã age fiya, are haiden atuneg to wõ yedig anĩ, ibodok yeya karĩ aun. Tamo taka ĩ tama nẽ kayau we fedig. <sup>2</sup> Age fe di, ã aug selĩ wabigedig! Age fiya ban, ã wauĩ gudũf fen, tamo tobonunã enei inof anĩ, ãgenei uyu kũ fiya bun walelnẽgouf, are deuf. <sup>3</sup> Aya bouwau ã geid to ibodok, anĩ ere, uur bun are, aya ã geid tabodok. Aya ã geid ibodõya gen, tamo enei age fen, are ĩ mogo es afiyen. <sup>4</sup> ã neda Odug Jesus yana bunem guru gouf bun, aya uur bun ã geid tabodõf, are neda Odug Jesus nẽ megeir ibodõf sain bun, <sup>5</sup> tamo enei Satan ima bun



unenēg, anī bunem, mosor nē bouwa daũf iraille fen, Odug nē naa bun yogon uur isennēya yalouf.

<sup>6</sup> Ā yeneĩ yaleseya are to biya. Yis naal bagai flawa obu namen kabĩ yaledig anĩ, ā to keleĩ de? <sup>7</sup> Ā flawa mata yis sã gen wõ gouf nigin, yis tubu anĩ waleleg, are ā anĩ flawa mata yis sã. Ere nigin, Kristus, neda Pasa naa nē sipsip naal, sesewi difiyen. <sup>8</sup> Anĩ nigin, ada Pasa Sifa naa anĩ tarouwauf, are yis tubu, sesen ado to biya nē yis bunem sã, anĩ ere, bret yis sã, karētut ado momoi nē bret bunem age tafouf.

<sup>9</sup> Aya ā noli tobonunã dinodig tamo kayau geid to nigal gouf nigin, neu pas mogo atokenein, <sup>10</sup> anĩ ere, aya teneub enei nē tamo kayau geid to nigal gouf nigin to orok, are idi noli tobonunã, erab erab nigin akorouya, idegēya bunem taka nē safina bē yaleya be, idegēya waitou yana yaleseya age difedig. Ā idi geid to nigal gouf are, ā teneub enei utorōgouf. <sup>11</sup> Anĩ ere, gama aya ā bun atotof are, ā taka ĩ yogo nigin tura ye fen, noli tobonunã, erab erab nigin akorouya, idegēya waitou yana yaleseya, bou yūya od wogōya, naan yōya be, idegēya bunem taka nē safina bē yaleya age fedig, ĩ weim to nigal gouf. Tamo age fiya ado weim saafeg to wāgauf.

<sup>12</sup> Ere nigin aya idi sios mayarē difaref anĩ es afediyouf? Are, idi sios namen difaref anĩ ā to es wiyēdigef de? <sup>13</sup> Negur idi sios mayarē difaref anĩ es fediyouf. Are Negur nē Itotoya bun eig ye irok kilei, “Ā atun tamo sane anĩ walelnēgouf.”\*

## 6

### *Momoiya Tamo Kayau Atun Kot Fiya*

---

\* 5:13: Diuteronomi 17:7; 19:19; 21:21; 22:21, 24; 24:7

<sup>1</sup> Āgenei takam, taka ado fefuya yenēf are, ere nigin ĩ Negur nē tamo kayau wagedin irouleya ban, ĩ idi momoiya sã anidi bun, mama sã gen es fiya nigin irouledig? <sup>2</sup> Are Negur nē tamo kayau teneub enei es difouf anĩ, ã to keleĩ de? Ā teneub enei es gouf are, ã morõ naal bagai es fiya nigin kisi feleya sã de? <sup>3</sup> Are amã engel es mafediyouf anĩ, ã to keleĩ de? Age fouf are, mata ibodõya enei nē morõ es fiya nigin naig fiyauf? <sup>4</sup> Anĩ nigin, ã teneub enei nē morõ age fediya nigin fefuya adouf are, ã haiden idi, sios bun tamo yeneid sã anidi, es fiya tamo nigin ugirnēdigef de? <sup>5</sup> Aya ã mama yeĩf nigin od enei orok. Are ã atun, momoiya tamo kayau fefuya idi atun ibodok anĩ, es fiya nigin kisi biya ado tamo taka sã de? <sup>6</sup> Anĩ ere, momoiya tamo takam tura taka kiwai ifen ken, kot bun iledig, are enei momoiya sã anidi wagedin irouledig.

<sup>7</sup> Momoi bagai, ã atun abob nigin kot bun fefuya ibodok anim, ã mogo kuku gen anĩ yaoref. Ere nigin ã idi to utornēdige di, sane diyeĩf? Ere nigin ã idi to utornēdige di, didegneĩf? <sup>8</sup> Age fiya ban, ã aug udegēg fen, sane ago gedig, are ã tureĩ tar bun enei ago gedig.

<sup>9</sup> Tamo tobonunã sesen idi, Negur nē tano to akorouf anĩ, ã to keleĩ de? Are ã idi to utornēdige di, didegneĩf. Idi noli tobonunã dinodig, idi idegēya waitou yana dalesedig, idi seseirã tobonunã dinodig, tamo idi bouweid na nē sur difedig, tamo tutur, kayau tutur noli tobonunã dinodig, <sup>10</sup> idi bē daledig, idi ereb ereb safina nigin akorou dedig, idi naan dōdig, idi bou yūya od wogō dedig, idi idegēya bunem taka nē safina daledig anidi ganam, Negur nē tano to akorouf. <sup>11</sup> Are ã tunĩ age fiya anĩ ago gedig. Anĩ ere, ã mosor bun tamal kulo yein, are ã fateul inenein, are ã, Odug Jesus Kristus yana bun ado neda Negur nē Awa Uur bunem, Negur mala bun madur bagai wowã gen.

*Noli Tobonunã*

<sup>12</sup> Taka irõf, “Aya ereb ereb ganan nigin sã age afeid kisi feleya.” Are de momoi, anĩ ere, ereb ereb ganan to isennadauf. Aya ereb ereb ganan nigin sã age afeid kisi feleya, anĩ ere, aya ereb takam to irona di, ferfer abodõf.

<sup>13</sup> Taka irõf, “Saaf are te guroub nẽ, te guroub are saaf nẽ.” Anĩ ere, Negur anĩ ganan daũ falauf. Bouwa are noli tobonunã nẽ sã, anĩ ere, Odug nẽ, are Odug ã bouwa anĩ nẽ.

<sup>14</sup> Are, Negur yogon megeir bunem Odug laa bun tamal yalesnen, are adag ã yalesnadauf. <sup>15</sup> ã bouweĩ are, Kristus yogo bouwa nẽ tunĩ anĩ ã to keleĩ de? Age fiyauf are, aya Kristus bouwa nẽ tunĩ ale fen, kayau bouwa na sur fedig ado bagu afouf de? Sã bagai! <sup>16</sup> Tamo ã yogo, kayau taka bouwa na nẽ sur fedig ado bagu difouf are, ã kayau anĩ ado bouwa tekelei youf anĩ, ã to keleĩ de? Ere nigin, Negur nẽ Itotoya bun eig ye irok, “Idi urom bouweid tekelei youf.”\*

<sup>17</sup> Anĩ ere, taka ã yogo Odug ado bagu difouf are, ã uur bun Odug ado tekelei youf.

<sup>18</sup> Noli tobonunã bun tamal uyagauf. Mosor tunĩ ganan tamo taka inof, are ã yogo bouwa serẽ inof, anĩ ere, taka ã yogon bouwam noli mosor inof, are ã yogo bouwa bun mosor inof. <sup>19</sup> ã bouweĩ are Awa Uur Fateul nẽ tempel, Awa Uur Fateul are ã namein ibodok anĩ Negur bun tamal walegen are, ã to keleĩ de? ã aug, ãgenei sã, <sup>20</sup> ere nigin, ã mala odugem na yaleyeyin. Anĩ nigin, bouweĩ anim Negur yana walesagauf.

## 7

*Tamo Kayau Ado Bagu Fiya Nigin*

<sup>1</sup> Gama od anĩ ã utotogen nigin arokeneik, tamo ã kayau to yalouf, are deuf. <sup>2</sup> Anĩ ere, noli tobonunã musei bagai

---

\* **6:16:** Jenesis 2:24

ibodok nigin, are tamo mugu mugu ï yogon kayau adouf, are kayau mugu mugu ï yogon tamo adouf. <sup>3</sup> Tamo ï yogon bouwa nigin, yogon kayau to katũ fiyēf, age fiya gen, kayau ïg yogon bouwa nigin yogon tamo to katũ fiyēf. <sup>4</sup> Kayau ï yogon bouwa nē mudur to ibodōf, are yogon tamo nē, age fiya gen, tamo ï yogon bouwa nē mudur to ibodōf, are yogon kayau nē. <sup>5</sup> Ā abob nigin bouweï to katũ gouf, anī ere, ā kosē gouf nigin, sain naal bagai yo ge fen, bouweï katũ gouf, are kisi falauf. Agog fen, ā bouweï kulatun fiya anī, malai nigin, are Satanem to kisi yeïf nigin, baban ā bouweï bagu gouf. <sup>6</sup> Aya od enei karī gouf nigin orok, are itāfiya sã. <sup>7</sup> Tamo ganan aya gen dibodok, are aya orouf. Anī ere, tamo mugu mugu idi, Negur bun dogo neid ege luwa dalef, taka ege luwa enei, taka ege luwa anī.

<sup>8</sup> Anī ere, aya kayau tamo yaleya sã, tamo kayau yaleya sã ado, waab arokenēdif, are idi aya gen age de dibodok dilauf, are deuf. <sup>9</sup> Anī ere, idi dogo bouweid nigin kulatun fiya kisi feleya sãf are, tamo idi kayau dalouf, kayau idi tamo dalouf, ere nigin, noli kisi waud bun yã gen bobo reya anī ban, tamo idi kayau yaleya, kayau idi tamo yaleya are deuf.

<sup>10</sup> Tamo idi kayau adodo, kayau idi tamo adodo bun, aya od enei arokenēdif, are ayam sã, Odugem. Are kayau ï ne tamo to itornēf. <sup>11</sup> Anī ere, kayau ï tamo itornēf are, ï tamo taka to yalouf be, are ï yogon tamo ado komo difouf. Are tamo ï yogon kayau to iru irailauf.

<sup>12</sup> Ā tunī ganan bun, aya od enei arokenēdif, are ayam, Odugem sã. Tura taka ï kayau ado, are kayau ï momoiya sã, anī ere, ï tamo ado ibodōya nigin oro fouf are, tamo ï kayau anī to iru irailauf. <sup>13</sup> Kayau taka ï tamo ado, are tamo ï momoiya sã, anī ere, ï kayau ado ibodōya nigin oro fouf are, kayau ï tamo anī to iru irailauf. <sup>14</sup> Ere nigin, tamo

momoiya sã ã, yogon kayau bunem fateulen, are kayau momoiya sã ã, yogon momoiya tamo bunem fateulen. Age fiya sãf are, ã gereĩ tar idi karētut to dibodōf. Anĩ ere, idi gama fateul dibodok.

<sup>15</sup> Anĩ ere, taka ã momoiya sã, iyawau fenē nigin oro fouf are, utornēge di, age foug. Suma age fiya bun, momoiya tamo be kayau, ereb taka anim to katĩ fiyek. Are Negur ã ada wau inosiya bun tabodōf nigin iweignadan. <sup>16</sup> Kayau ò, nē tamo usennēf be sã be anĩ, naig fe di, ò keleĩ youf? Tamo ò, nē kayau usennēf be sã be anĩ, naig fe di, ò keleĩ youf?

<sup>17</sup> Odug ada mugu mugu igirnadan kilei ado, Negur ada mugu mugu iweignadan kilei bagai, age tag, mata tabodōgouf. Are, aya sios ganan bun nun enei anof. <sup>18</sup> Sain Negur ã tamo taka iweignen, tamo ã mogo mulũ ilen de? Are tamo ã mulũ ileyã sã to ilauf. Sain Negur ã tamo taka iweignen, tamo ã mulũ ileyã sã de? Are tamo ã to mulũ ilauf. <sup>19</sup> Mulũ ileyã are ege, mulũ ileyã sã areg ege. Anĩ ere, Negur nē ãtãfiya dō fiya anĩ odug bagai. <sup>20</sup> Tamo mugu mugu ã Negur iweignen sain bun, ã ibodon suma anĩ bun, agef ibodōf. <sup>21</sup> Sain Negur ã iweignon, ò ferfer ubodon de? Ò anĩ nigin to morō yōf, anĩ ere, ò ferfer itorōya nigin kisi falauf are, anĩ ò agouf. <sup>22</sup> Ere nigin, taka ã, Odugem iweignen sain bun, ferfer ibodon, ã Odug nē karika tamo ibodok, age fiya gen, taka ã iweignen sain bun, karika tamo ibodon, ã Kristus nē ferfer ibodok. <sup>23</sup> ã mala odugem na yaleyain. ã tamo neid ferfer to wowã gouf. <sup>24</sup> Turau tar, tamo mugu mugu ã Negur iweignen sain bun ibodon suma anĩ bun, agef Negur ado dibodōf.

<sup>25</sup> Kayau taulei nigin, aya Odug bun tamal ãtãfiya taka to alen. Anĩ ere, aya, taka ã Odug nē wau yũya bunem momoi bagai tamo wō yen anĩ, aya neu kisi afeneik. <sup>26</sup> Gama enei nē morō odug nigin, aya kisi afef, are tamo ã gama ibodok

gen, agef ibodōf, are deuf. <sup>27</sup> Ō kayau ado de? Age fiyauf are, ō kayau iru iraileya nigin naab to umirēf. Ō kayau to walen de? Age fiyauf are, ō kayau taka yaleya nigin to umirēf. <sup>28</sup> Anī ere, ō kayau walef are, ō mosor to unof. Kayau taulei taka tamo yalef are, ī mosor to inof. Anī ere, tamo kayau dalef, kayau tamo dalef, idi mata ibodōya enei bun morō musei dalouf, are aya morō enei ā bun to wō youf anī orouf.

<sup>29</sup> Turau tar, aya od enei arokeneik, are sain mogo tobegaf, anī nigin, gama sain enei ilef bun, idi kayau ado, idi kayau sã gen dibodōf; <sup>30</sup> idi maruid isif, idi to maruid isif gen dibodōf; idi waud al difef, idi waud to al difef gen dibodōf; idi ereb taka na dalef, idi ereb taka sã gen dibodōf; <sup>31</sup> idi teneub enei nē safina diroudif, are idi waud adok anī bun to dinouf. Ere nigin, teneub enei, gama agef ibodok anī, inanakalauf.

<sup>32</sup> Aya ā to suwē gouf nigin orouf. Tamo kayau sã, ī Odug nē kabī nigin kisi fedig, are ī ereb age fe di, Odug al foug nigin kisi fedig. <sup>33</sup> Anī ere, tamo kayau ado, ī teneub enei nē bouwa isennēya nigin kisi fedig, are ī ereb age fe di, yogon kayau al foug nigin kisi fedig. <sup>34</sup> Age fe di, yogon kisi fara fedig. Kayau tamo sã be, kayau taulei, ī Odug nē kabī nigin kisi fedig, are ī bouwa ado uur bun fateul wō youf nigin age fedig. Anī ere, kayau tamo ado, ī teneub enei nē bouwa isennēya nigin kisi fedig, are ī ereb age fe di, yogon tamo al foug nigin kisi fedig. <sup>35</sup> Aya od enei āgenei biya fiya nigin orok, aya ā ifōyeif nigin to age afef, anī ere, ā madur agog fen, ā aug nigin Odug bun fara fiya sã wenēgouf nigin age afef.

<sup>36</sup> Anī ere, tamo taka ī, kayau taulei yaleya nigin digirnen anī, ī bun tobonunã biya sã age afef ye fen, kayau ī tamo yaleya nē sain mogo wal fe di, tamo ī kayau yaleya nigin kisi fef are, tamo ī yogon oroya kilei age foug. Ī mosor

to inof, are idi bagu difouf. <sup>37</sup> Anĩ ere, tamo ĩ yogon wau bun total ifar fen, taka nẽ kisim to we fiyẽf, anĩ ere, yogon oroya dõf fen, kayau taulei anĩ to yalouf nigin yogon kisi ifõf are, areg ĩ tutuk age fouf. <sup>38</sup> Anĩ nigin, tamo ĩ kayau taulei yalef are, ĩ tutuk age fef, anĩ ere, tamo ĩ kayau to yalef are, ĩ tutuk bagai age fef.

<sup>39</sup> Kayau ĩ yogon tamo fau mata ibodõf are, ĩ yogon tamo ado dibodõf. Anĩ ere, yogon tamo laa fouf are, ĩ yogon oroya dõf fen, taka bun ileyã kisi feleyã, anĩ ere, tamo ĩ Odug nigin momoi yef anĩ bun dogol. <sup>40</sup> Anĩ ere, neu es fiya bun, kayau ĩ gama ibodok gen, ibodõf are, ĩ fatuk bagai al fouf. Aya kisi afef, are ayag Negur nẽ Awa Uur ado.

## 8

### *Saaf Idegẽya Waitou Bun Sesewi Difen*

<sup>1</sup> Gama, saaf idegẽya waitou bun sesewi difedig nigin, ada keleĩ, are ada ganã keleĩ ado. Keleĩ are yogo yana yaleseya inodig, anĩ ere, wau laa fiya anim biya yalesedig.

<sup>2</sup> Tamo ĩ ereb taka nigin aya keleĩ yef are, ĩ ereb taka keleĩ youf anĩ ĩ fau keleĩ sã. <sup>3</sup> Anĩ ere, tamo ĩ Negur nigin wau laa fef are, Negur ĩ nigin keleĩ.

<sup>4</sup> Anĩ nigin, saaf idegẽya waitou bun sesewi difedig anĩ yõya nigin, ada keleĩ, are tenebur ein idegẽya waitou are ege, anĩ ere, Negur taka sã, tekelei dogol ibodok. <sup>5</sup> Ere nigin, saa be teneub bun, idi waitou dedig anĩ dibodok, are momoi bagai waitou musei ado odug musei dibodok, <sup>6</sup> anĩ ere, ada bun Negur tekelei dogol ibodok, are Dei, ĩ bun tamã ereb ereb ganã wõ yen, ĩ nigin ada mata tabodok. Odug tekelei dogol ibodok, are Jesus Kristus, ĩ bunem ereb ereb ganã wõ yen, ĩ bunem ada mata tabodok.

<sup>7</sup> Anĩ ere, tamo ganã enei keleĩ sã. Tamo kayau tunĩ fau idegẽya waitou nigin fatuk bagai kisi difedig nigin, sain idi saaf anĩ doko, idi saaf anĩ idegẽya waitou bun sesewi difen

de fen, kisi difedig, age dife di, idi waud total sã nigin, amuyēdig. <sup>8</sup> Anĩ ere, saafem ada Negur non to irouladauf, are ada saaf to tãf are, anim ada to daũ fadauf, ada saaf tãfeg, anim ada to isennadauf.

<sup>9</sup> Anĩ ere, ereb ã karika ago gouf anim, idi momoiya total sã anidi bun, naabura gudũ fiya to wenēdigouf nigin lo walagauf. <sup>10</sup> Ere nigin, taka ĩ wau total sã anĩ, õ keleĩ enei ado, idegēya waitou nē tempel bun saaf wõ mog ileyõf are, ĩ saaf idegēya waitou bun sesewi difen anĩ, kumĩ sã to yãf de? <sup>11</sup> Anĩ nigin, turã total sã, ĩ nigin Kristus laa fen, are ogon keleim ĩ daũ fiyek. <sup>12</sup> Sain ã naab enei bun tureĩ tar bun mosor unog fen, dogo neid waud total sã anĩ daũ wedigef are, ã Kristus bun mosor unogef. <sup>13</sup> Anĩ nigin, ereb aya ãf anim neu turau mosor bun inenēf are, ayam ĩ mosor bun to anenēf nigin, aya muda baban to bagai ãf.

## 9

### *Aposel Ereb Yaleya Nigin Kisi Feleya*

<sup>1</sup> Ereb takam aya katĩ fiyaf de? Aya aposel sã de? Aya Jesus neda Odug to ailen de? ã Odug bun neu kabĩ bunem to wõ gen de? <sup>2</sup> Tunĩ bun aya aposel sã be, anĩ ere, momoi bagai aya ã bun aposel. Ere nigin, ã Odug bun aya aposel kabĩ alef anĩ nē uris.

<sup>3</sup> Idi aya es difiyauf nigin dibodok anidi bun, isennaya od enei orok. <sup>4</sup> Amã saaf ado naan yõya nigin to kisi feleya de? <sup>5</sup> Amã, aposel tunĩ ganan, Odug nē tura tar ado Pita age difedig gen, kayau momoiya ado amã geid marou malauf, are to kisi feleya de? <sup>6</sup> Takag, aya ado Banabas dogol mata ibodõya nigin kabĩ malouf de?

<sup>7</sup> Aim kusĩ tamo kabĩ yale fen, yogo nigin ereb ereb na yaledig? Aim wain kabier wain iten ken, dogo neid biya to yõdig? Aim sipsip lof fen, dogo neid su sumin to yõdig?

<sup>8</sup> Aya tamo nē lo fiya bunem dogol, od enei orok de? Lo



anġ enei nigin tekelei bagai to irok de? <sup>9</sup> Ere nigin, Moses nē Lo bun eig ye itoton, “Ō bulmakau, wit faat biya nē gabar loko fediyouf nigin lalai feid mog, yogon awa to ufokalauf.”\* Negur ĩ bulmakau nigin kisi fef de? <sup>10</sup> Momoi, Negur ĩ od enei ada nigin to irok de? Momoi, od enei ada nigin itoton, ere nigin, tamo teneub gudū fedig ado, tamo wit faat biya nē gabar yaleledig, idi kusu fiya sain bun dogo neid morou morou dalouf nigin waud ise fen, age difedig. <sup>11</sup> Amã ã atun āgenei uur nigin faat mararan ouf are, amã ã bun bouwa buru nē safina kusu mafouf are, anġ odug biya de? <sup>12</sup> Tunġ ã bun isennēya enei yaleya nigin kisi falauf are, amã idi wal fiya anġ, to malouf de?

Anġ ere, amã ã bun safina yaleya nigin kisi feleya enei to age mafen. Age fiya ban, amã Kristus nē biya od to naabura gudū mafouf nigin, ereb ereb ganan faali mafef masin. <sup>13</sup> Idi tempel bun kabġ daledig anidi, dogo neid saaf tempel bun daledig, idi alta bun aruna daledig anidi, ereb alta bun sesewi difen anġ dale dogoledig, are ã to keleġ de? <sup>14</sup> Naab tekelei anġ bun, Odug iron, are idi biya od wogō def anidi, biya od bunem mata ibodōya nē safina dalouf.

<sup>15</sup> Anġ ere, aya safina yaleya nigin kisi feleya eneidi, anġ taka to age afen. Age afe fen, aya, ã aya nigin ago gouf nigin, enei to atotof. Takam yanau yaleseya enei aya bun yalelauf are, aya laa fiyauf anġ orouf. <sup>16</sup> Aya biya od wogō auf sain bun, aya yug nigin yanau to alesedig, ere nigin, Negurem biya od wogō auf nigin nugo fiyadig. Aya biya od to wogō auf are, aya bun morō odug bagai wō youf. <sup>17</sup> Aya neu oroya bunem kabġ enei alouf are, aya mala yaleya kisi feleya. Are neu oroyam sã, anġ ere, aya Negurem kabġ ifanan nigin age afef. <sup>18</sup> Age afouf are, ere anġ neu mala solo? Are, sain aya biya od wogō auf, aya mala yaleya sã

---

\* **9:9:** Diuteronomi 25:4

biya od wogō audig, are aya biya od bun mala yaleya nigin kisi feleya anī to age afedig.

<sup>19</sup> Aya tamo taka nē sā, are aya karika, anī ere, aya tamo musei kisi feleya bagai gei afouf nigin, aya yug tamo ganan nē ferfer wō auf. <sup>20</sup> Juda idi bun, aya Juda idi gei afouf nigin, Juda tamo gen wō aun. Idi lo farumen dibodok anidi bun, aya yug lo farumen to abodok, anī ere, aya idi lo farumen dibodok anidi gei afouf nigin, aya tamo lo farumen ibodok gen wō aun. <sup>21</sup> Idi lo sā anidi bun, aya Negur nē lo bun karika sā, are aya Kristus nē lo farumen abodok, anī ere, aya idi lo sā anidi gei afouf nigin, aya tamo lo sā gen wō aun. <sup>22</sup> Idi furūya anidi bun, aya idi furūya anidi gei afouf nigin, aya tamo furūya gen wō aun. Aya ereb ereb ganan kisi feleya anī bunem, tunī kel gei afouf nigin, tamo ganan bun, idi dibodok gen tobonunā age fiya gen wō aun. <sup>23</sup> Aya biya od nigin enei ganan age afedig, are aya biya od nē el fiya weim talouf nigin.

<sup>24</sup> Gududuya bun, tamo ganan gududu dedig, anī ere, tekeleim dogol mala yaledig anī ā to keleī de? Naab age fiya bun, gududu ge fen, mala walougouf.

<sup>25</sup> Tamo ganan kodē wal difouf nigin age difedig anidi, ereb ereb ganan bun totoo bagai tai difedig. Idi mala fau sa kalauf anī dalouf nigin age difedig, anī ere, amā mala gai gai ibodkalauf anī yaleya nigin age mafedig. <sup>26</sup> Anī nigin, aya tamo gariya sā gudu redig gen, to gudu raudig. Aya yau yūdig gen, to ege imau warū yeledig. <sup>27</sup> Anī ere, aya yug bouwau au ken, anī neu ferfer ibodōf nigin age afedig, are aya tunī wogō afiyeid fen, aya yug mala solo yaleya nigin, kisi feleya sā to bagai wō auf nigin age afedig.

## 10

*Israel Neid Tubuid Tar Bun Weder Irouya Od*

<sup>1</sup> Turau tar, aya ã enei to keleĩ youf nigin to orouf, are Moses nē sain bun, tubuda tar ganan budū farumen difar fen, idi ganan Maaĩ Giriya atu diyok dilen. <sup>2</sup> Idi ganan budū bun ado maaĩ bun naan dale fen, Moses nē ibor tar wowā den. <sup>3</sup> Are, idi ganan uur nē saaf tekelei anĩ don, <sup>4</sup> idi ganan uur nē naan tekelei anĩ don, are uur nē meein idi geid weim diyok dilen anĩ bun, idi naan don, meein are Kristus. <sup>5</sup> Anĩ ere, Negur ĩ idi musei ganan nigin wau to al fen, anĩ nigin, dogo neid bouweid gerere tuan firagagaũ difen.

<sup>6</sup> Enei ganan ada wederada irouya nigin wō yen, anĩ bunem ada idi age difen gen, ereb sane nigin wauda to tanouf. <sup>7</sup> Idi neid tunĩ gen, ã idegēya waitou yana to walesagauf. Are Negur nē Itotoya bun eig ye irok, “Tamo kayau saaf naan doko dibod ken, fafã de dale, noli tobonunã dinon.”\* <sup>8</sup> Ada idi tunĩ age difen gen, noli tobonunã to tanouf. Age dife di, naa tekelei bun, idi atun tuwenti tri tausen tamo kayau gare den. <sup>9</sup> Ada idi tunĩ age difen gen, Odug kisi fiya bun to tanenēf. Idi age difen, gogourum didenkesin. <sup>10</sup> Ada idi tunĩ gen, to nauseir tauf. Idi age difen, daũ fiya nē engelem idenkesin.

<sup>11</sup> Eneidi ada ifelnadauf nigin idi bun wō yen, are idikeleya sain, ada bun mogo wō yen anĩ bun, wederada irouya nigin itoton. <sup>12</sup> Anĩ nigin, taka ĩ kisi fef, total ifaref yef, ĩ to kubū youf nigin lo falauf. <sup>13</sup> Kisi fiya ganan ã bun wō yedig, are tamo bun wō yedig dogol. Anĩ ere, Negur ĩ age afouf yef anĩ, age fedig, ĩ kisi fiya ã yaleya kisi feleya sã anĩ, ã bun to wō youf nigin age fouf. Anĩ ere, ã kisi yeĩf sain bun, Negur ĩ iyawoya nē naab anĩg ifelneif, anĩ bunem ã total ufaragauf nigin sã kisi falauf.

*Saaf Idegēya Waitou Bun Dinon Ado Odug Nē Saaf*

---

\* **10:7:** Eksodas 32:6

<sup>14</sup> Anĩ nigin, neu turau tar oboiyou, idegēya waitou yana yaleseyā bun tamal uyalalagauf. <sup>15</sup> Aya ā tamo kayau kisi biya ado gen arokeneik, ereb aya arok anĩ, ā aug es gouf. <sup>16</sup> De fiyēya nē kap, ada de fiya tafenedig, are Kristus nē naud bun bagu fiya sā de? Bret ada mumā tafedig, are Kristus nē bouwa bun bagu fiya sā de? <sup>17</sup> Bret tekelei dogol ibodok nigin, ada musei, anĩ ere, bouwada tekelei, ere nigin, ada ganan bret tekelei anĩ bun bagu tafedig.

<sup>18</sup> Israel tamo kayau nigin kisi walogouf, idi sesewi fiya nē saaf dōdig anidi, alta bun to bagu difedig de? <sup>19</sup> Age foug are, ere anĩ kisi afef, are sesewi fiya nē saaf idegēya waitou difenek anĩ odug de, oo idegēya waitou anĩ odug de? <sup>20</sup> Sā, anĩ ere, haiden neid sesewi fiya anĩ kaa sesen bun difenedidig, are Negur bun sā. Are aya ā kaa sesen geid bagu gouf nigin to orouf. <sup>21</sup> Ā Odug nē kap bun ado kaa sesen neid kap buneg yōya nigin kisi feleya sā. Ā Odug nē tebol bun ado kaa sesen neid tebol buneg bagu fiya nigin kisi feleya sā. <sup>22</sup> Ada Odug kiyē ifanadauf nigin age tafef de? Ada neda megeir ĩ wal fiya de?

### *Momoiya Tamo Kayau Neid Tobonunã*

<sup>23</sup> Tunĩ dirōdig, “Ada ereb ereb ganan nigin, sā age tafeid, age fiya nigin kisi feleya,” anĩ ere, ereb ereb ganan to isennadauf. Tunĩ dirōdig, “Ada ereb ereb ganan nigin, sā age tafeid, age fiya nigin kisi feleya,” anĩ ere, ereb ereb ganan biya fiya to inouf. <sup>24</sup> Taka ĩ yogon biya fiya nigin to imirēf, anĩ ere, tunĩ neid biya fiya nigin imirēf.

<sup>25</sup> Ereb ereb yaro maket bun na sur difedig anĩ, āgenei kisi bun to fiya sā wāgauf, <sup>26</sup> ere nigin, “Teneub ado ereb ereb ganan anĩ namen yenek are Odug nē.”†

<sup>27</sup> Momoiya sā tamo taka, saaf yōya nigin ā iweignei di, ā ilya nigin oroyeif are, ereb ereb ā meleĩ bun inodin

---

† 10:26: Sam 24:1

anĩ, āgenei kisi bun to fiya sã wāgauf. <sup>28</sup> Anĩ ere, taka ĩ ā irokeneĩf, “Enei are sesewi fiya bun difenen,” youf are, tamo irokenein ĩ nigin ado kisi es fiya yaor karētut ibodōf nigin, saaf anĩ to wāgauf. <sup>29</sup> Neu wogōya nē gariya are, tamo anĩ nē kisi es fiya nigin, are āgenei kisi es fiya nigin sã. Taka nem irōf, “Age fiyauf are, ere nigin neu erēb erēb nigin kisi feleya anĩ, tamo taka nē kisim es foug?” <sup>30</sup> Aya de fiya bunem saaf āf are, ere nigin taka nem saaf anĩ nigin, Negur de afiyek nigin bou yūya od irok?”

<sup>31</sup> Anĩ ere, ā saaf wāgauf, naan wāgauf ado, erēb erēb ganān ago gouf are, Negur nē fula fiya medeīya nigin anĩ ganān ago gouf. <sup>32</sup> Juda tamo, Grik tamo be, Negur nē sios bun tamo taka, to ye tū foug nigin ago gouf. <sup>33</sup> Ayag naab ganān bun tamo ganān al afiyēdiyof nigin age afedig gen, ago gouf. Ere nigin, aya neu biya fiya to amirek, anĩ ere, musei isennēdiyof nigin, dogo neid biya fiya amirek.

## 11

<sup>1</sup> Ayag Kristus madē afiyēdig gen, ā aya madē wiyagauf.

### *Negur Yana Yaleseya Bun Mudur Kerū Fiya*

<sup>2</sup> Aya ā yeneĩ alesef, ere nigin, ā erēb erēb ganān bun aya nigin karĩ weleg fen, ifelnēya anĩ aya ale fen, ā afenein anĩ, kafĩ weleg uroug usigef.

<sup>3</sup> Anĩ ere, aya ā eig fiya anĩ keleĩ youf nigin orouf, are tamo ganān neid mudur are Kristus, kayau nē mudur are tamo, Kristus nē mudur are Negur. <sup>4</sup> Tamo ganān, taka ĩ yogon mudur kerū fel fen, kosē yef be, profet od wogō yef, ĩ yogon mudur Kristus mama ifenek. <sup>5</sup> Kayau ganān, taka ĩ yogon mudur to kerū fel fen, kosē yef be, profet od wogō yef, ĩ yogon mudur, are aiwa anĩ mama ifenek, are ĩ yogon fatiya korerē feleya gen. <sup>6</sup> Kayau taka ĩ yogon mudur kerū fiya sãf are, ĩ yogon fatiya gudū falauf. Kayau taka ĩ yogon fatiya gudū foug be, korerē foug anim, mama

ifenēf are, ĩ yogon mudur kerũ fouf. <sup>7</sup> Tamo taka ĩ yogon mudur to kerũ fouf, ere nigin, ĩ Negur nē malakanon ado fula fiya medeīya, tamo bun. Anĩ ere, kayau ĩ tamo nē fula fiya medeīya, kayau bun. <sup>8</sup> Ere nigin, tamo ĩ kayau bunem to isin, anĩ ere, kayau ĩ tamo bunem isin. <sup>9</sup> Takag, tamo ĩ kayau isennēf nigin to inon, anĩ ere, kayau ĩ tamo isennēf nigin inon. <sup>10</sup> Age fiya nigin, kayau ĩ, engel idi neid meleid bun, ĩ tamo farumen ibodok anĩ ifelnēdiyof nigin, yogon mudur kerũ fouf.

<sup>11</sup> Anĩ ere, Odug bun kayau ĩ tamo bun yogo mugu to ifaref, tamo ĩg kayau bun yogo mugu to ifaref. <sup>12</sup> Ere nigin, kayau ĩ tamo bunem isin gen, tamo ĩg kayau bunem wõ yen. Anĩ ere, ereb ereb ganan Negur bun tamal isif. <sup>13</sup> Ā aug es gouf, are kayau taka ĩ yogon mudur to kerũ fel fen, Negur kosē fiyek, are de de? <sup>14</sup> Tamo taka fatiya salo isiya adouf anim mama ifenek anĩ, tamo nē tobonunã anĩ to ifelneik de? <sup>15</sup> Anĩ ere, kayau taka ĩ fatiya salo isiya adouf, are yogon fula fiya medeīya. Ere nigin, fatiya salo isiya are, yogon mudur kerũ fiya nigin ifenen. <sup>16</sup> Anĩ ere, taka ĩ od enei kiwai ifenēf are, ada suma taka sã, Negur nē sios buneg suma taka sã.

### *Odug Nē Saaf*

*(Matyu 26:26-29; Mak 14:22-25; Luk 22:14-20)*

<sup>17</sup> Faded fiya dõ fiya enei bun, aya ã yeneĩ to alesef, ere nigin, āgenei guru fiya biya anĩ fotokar sane isidig. <sup>18</sup> Uruwa bun, aya karĩ aun, are ã sios nigin guru gef ã atun, fara fiya yenēdig, age afe fen, od tunĩ aya momoi auf. <sup>19</sup> Ā atun fara fiya bagai yenek, anĩ bunem, ã atun ai anĩ Negur yo fiyen anĩ ifelneif. <sup>20</sup> Anĩ nigin, sain ã guru gef, are Odug nē Saaf bagai anĩ to wõgedig, <sup>21</sup> ere nigin, sain ã saaf wõgef bun, ã abob tari fediya sã, mugu mugu saaf wõgedig, anĩ nigin, taka ĩ naũ ibodõdig, taka ĩ naan yõdig. <sup>22</sup> Saaf ado

naan yōya nigin ã fō sã de? ã Negur nē sios lai ge fen, idi safina sã anidi mama wenēdigef de? Aya ã ere ayeif? Aya enei nigin ã yeneĩ alesauf de? Sã bagai! Aya enei nigin ã yeneĩ to alesauf.

<sup>23</sup> Ere nigin, aya enei Odug bun tamal ale fen, ãg afenein. Are Odug Jesus, Judas ĩ kiwai ifenen bō anĩ bun, bret yale, <sup>24</sup> Negur de fiye ken, bret anĩ mumãf fen, iron, “Enei neu bouwau, are ã nigin. Aya nigin karĩ walagauf nigin enei ago gouf.” <sup>25</sup> Naab tekelei bun, bō saaf bure difel fen, ĩ kap yale fen, iron, “Kap wain enei neu naudou bun bar itenēya mata. Sain ganan ã wãgauf, aya nigin karĩ walagauf nigin enei ago gouf.” <sup>26</sup> Ere nigin, sain ganan ã bret enei wōg fen, kap enei bun wãgauf, ã Odug nē laa nigin kurō wesig mog, ĩ fau isiyouf.

<sup>27</sup> Anĩ nigin, taka ĩ tutuk sã bret anĩ yãf be, Odug nē kap bun yãf are, ĩ Odug nē bouwa ado naud bun mosor inouf. <sup>28</sup> Taka ĩ yogo nigin es fel fen, bret anĩ yoko, kap anĩ bun yãf. <sup>29</sup> Ere nigin, taka ĩ Odug nē bouwa nigin to kisif fen, bret yoko, kap bun yãf are, ĩ yogon es fiya anĩ yogo yoko. <sup>30</sup> Anĩ nigin, ã atun musei malegeid fen, dagi didig, ãgenei tunĩ gare den. <sup>31</sup> Anĩ ere, ada nigin es tafouf are, ada es fiya bun to tabodōf. <sup>32</sup> Sain ada Odugem es fadauf, are ada Odugem madur fadauf, are ĩ teneub enei nē tamo kayau geid ada mosor ado to youf nigin age fouf.

<sup>33</sup> Anĩ nigin, neu turau tar, sain ã yōya nigin guru gouf are, ã abob nigin tari gouf. <sup>34</sup> Taka ĩ naũ fouf are, ĩ fō bun yãf, anĩ bunem, sain ã guru gouf, ã es fiya bun to ulagauf. Sain aya asiyouf, aya faded fiya tobol afeneif.

## 12

*Awa Uur Fateul Nē* Ege Luwa

<sup>1</sup> Turau tar, aya ã Awa Uur Fateul nē ege luwa nigin to keleĩ youf anĩ to orouf. <sup>2</sup> ã keleĩ, sain ã haiden ubodōgen,

naab fire fire bun ditonei ken, eweid ifofakeleya idegēya waitou bun, fō yeleya nigin dirou dileyein. <sup>3</sup> Anī nigin, aya ā arokeneik, are taka ī Negur nē Awa Uur bunem wogō yef, ī to irōdig, “Jesus sane lauf.” Takag, taka nem eig ye irōya kisi feleya sā, “Jesus ī Odug,” are Awa Uur Fateulem dogol.

<sup>4</sup> Ege luwa nigin fire fire dibodok, anī ere, Awa Uur anī tekelei. <sup>5</sup> Kabī gariya fire fire dibodok, anī ere, Odug tekelei. <sup>6</sup> Kabī nē megeir fire fire dibodok, anī ere, Negur tekelei ī, tamo ganan bun, kabī nē megeir ganan nigin kabī yaledig.

<sup>7</sup> Tamo ganan isennēdiyof nigin, tamo mugu mugu bun Awa Uur yaor fedig. <sup>8</sup> Taka bun Awa Uur bunem kisi biya nē od ifenek, taka bun Awa Uur tekelei bunem keleī nē od ifenek, <sup>9</sup> taka bun Awa Uur tekelei bunem momoiya anī ifenek, taka bun Awa Uur tekelei anī bunem dagi el fiya nē ege luwa ifenek, <sup>10</sup> taka bun memelik inoya nē megeir ifenek, taka bun profet od ifenek, taka bun uur es fiya ifenek, taka bun od fire fire nem wogōya ifenek, taka bun od fire fire nem wogōya anī falei fiya ifenek. <sup>11</sup> Enei ganan Awa Uur tekelei dogol ī yogon kabī, ī yogon oroya dōf fen, tamo kayau mugu mugu anī ifenēdidig.

### *Bouwa Tekelei, Fara Fiya Musei*

<sup>12</sup> Bouwa anī tekelei, anī ere, bouwa anī fara fiya musei bunem inof. Yogon fara fiya ganan are musei, anī ere, idi bouwa tekelei dinof. Kristus īg age fiya. <sup>13</sup> Ere nigin, ada ganan, Juda tamo be Grik tamo, ferfer be kafī fiya sā tamo, Awa Uur tekelei bunem naan tale fen, bouwada tekelei wō taun, agef fen, ada ganan Awa Uur tekelei naan gen tokon, megeir talouf nigin ifanadan.

<sup>14</sup> Bouwa ī fara fiya tekeleim to inof, anī ere, fara fiya museim inof. <sup>15</sup> Ye ī, aya ima sā, anī nigin, aya bouwa nē tunī sā youf, anī ere, gariya anī bun ī aya bouwa nē tunī



sã yeya kisi feleya sã. <sup>16</sup> Takag, weder ï, aya mala sã, anï nigin, aya bouwa nẽ tunï sã youf, anï ere, gariya anï bun ï aya bouwa nẽ tunï sã yeya kisi feleya sã. <sup>17</sup> Bouwa adok malauf are, nainenem karï wouf? Bouwa adok wederouf are, nainenem sumeï walouf? <sup>18</sup> Anï ere, momoi, Negur ï bouwa nẽ fara fiya, ï orof kilei bagai, mugu mugu ganan inenẽdin. <sup>19</sup> Bouwa nẽ fara fiya anï ganan tekelei youf are, bouwa ï nain ibodõf? <sup>20</sup> Age fiya gen, bouwa nẽ fara fiya musei dibodok, anï ere, bouwa de tekelei.

<sup>21</sup> Mala ima to irokenẽf, “Aya õ to orouf!” Are, mudur ye to irokenẽf, “Aya õ to orouf!” <sup>22</sup> Age fiya ban, bouwa nẽ fara fiya tunï total sã tailedig anï sãf are, bouwa ibodõya kisi feleya sã. <sup>23</sup> Ada bouwa nẽ fara fiya yana sã gen tauf anï, ada yana talesedig. Ada bouwa nẽ fara fiya yaor fiya kisi feleya sã anï, dede ta, ed tafedig, <sup>24</sup> anï ere, bouwada nẽ fara fiya yaor fiya kisi feleya anï, ada to dede ta, ed tafedig. Anï ere, Negur ï bouwa nẽ fara fiya bagu feleid fen, fara fiya yana sã idi yana odug ifenẽdin, <sup>25</sup> anï bunem, bouwa bun foi fiya to ibodõf, anï ere, bouwa nẽ fara fiya idi abob nigin kilei kilei kisi difouf. <sup>26</sup> Bouwa nẽ fara fiya takam darau yalouf are, bouwa nẽ fara fiya ganan ï geid darau daledig. Bouwa nẽ fara fiya takam yana yalouf are, bouwa nẽ fara fiya ganan ï geid kulï dedig.

<sup>27</sup> Gama, ã Kristus nẽ bouwa, are ã mugu mugu anï nẽ fara fiya. <sup>28</sup> Sios bun Negur ï uyulil aposel ganan igirnẽdin, anï dõ fiya profet, anï dõ fiya tise, age fe di, memelik inoya tamo ado, dagi el fiya nẽ megeir dalen anidi, tunï isennẽdiya nigin kisi feleya anidi, ereb ereb lo fiya nigin megeir dalen anidi, od fire fire nem wogõya nigin kisi feleya anidig igirnẽdin. <sup>29</sup> Idi ganan aposel de? Idi ganan profet de? Idi ganan tise de? Idi ganan memelik dinof de? <sup>30</sup> Idi ganan dagi el fiya nẽ megeir dalef de? Idi ganan od fire fire nem wogõ def de? Idi ganan od fire fire nem

wogõya anĩ falei difef de? <sup>31</sup> Anĩ ere, Awa Uur nẽ ege luwa odug yaleya nigin kisi total walogouf.

Gama aya naab gai biya bagai taka afelneĩf.

## 13

### *Wau Laa Fiya*

<sup>1</sup> Aya tamo nẽ od fire fire nem ado engel nẽ od nem wogõ aufeg, wau laa fiya sãf are, aya belo gaõya be, kadod ait gũya gen dogol. <sup>2</sup> Aya profet od wogõya nigin Awa Uur nẽ ege luwa ado fen, Negur nẽ waa ganan ado keleĩ ganan kelei ken, arei godo fiya nigin momoiya odug ado, anĩ ere, wau laa fiya sãf are, aya tamo ege. <sup>3</sup> Aya ereb aya ado ganan maleg afeneid fen, bouwau atorõ di, yã malan dirãf, anĩ ere, aya wau laa fiya sãf are, aya mala biya taka to alouf.

<sup>4</sup> Wau laa fiya are molol, wau laa fiya are dor yaleya. Ĩ to kiyeĩ inodig. Ĩ yogo yana to yalesedig. Ĩ yogo to seli yabidig. <sup>5</sup> Ĩ tobonunã sane sã, ĩ yogo nigin aya dogol to yedig, ĩ kaisã to seye yedig, ĩ sane difiyek anĩ to karĩ yeledig. <sup>6</sup> Wau laa fiya anĩ sane nigin to kulĩ yedig, anĩ ere, momoi nigin kulĩ yedig. <sup>7</sup> Ĩ faimud kulatun fedig, ĩ faimud momoi yedig, ĩ faimud wau isedig, ĩ faimud feseya sã megeir ifaredig.

<sup>8</sup> Wau laa fiya are to bagai sa kalauf. Anĩ ere, profet od wogõya are sa kalauf, od fire fire nem wogõya are sa kalauf, keleĩ are sa kalauf. <sup>9</sup> Ere nigin, ada keleĩ tunĩ dogol kelei ken, profet od tunĩ dogol wogõ taudig, <sup>10</sup> anĩ ere, sain kibo feleya bagai anĩ isiyouf, kibo feleya bagai sã anĩ sa kalauf. <sup>11</sup> Aya simõ bun, aya simõ gen wogõ aun, aya simõ gen kisi afen, aya simõ gen karĩ aun. Sain aya biyau fen, aya simõ nẽ tobonunã dumeun arailen. <sup>12</sup> Gama ada dodo bun gen malakanon yaor sã tailedig, sain ada tarabã fadauf bun tutuk bagai tailauf. Gama aya tunĩ dogol keleĩ,

sain anĩ bun Negur aya nigin ganan keleĩ gen, aya ganan keleĩ youf.

<sup>13</sup> Are gama towo eneidi difaref, momoiya, wau iseya ado, wau laa fiya. Anĩ ere, anĩ atun wau laa fiya anĩ odug bagai, ganan wal fiya.

## 14

*Profet Od Wogõya Ado Od Fire Fire Nem Wogõya Nigin Awa Uur NĒ* Ege Luwa

<sup>1</sup> Wau laa fiya nĒ naab dõg fen, Awa Uur nĒ ege luwa yaleya nigin kisi total walogouf, Awa Uur nĒ ege luwa bun profet od wogõya nĒ anĩ bagai walogouf. <sup>2</sup> Ere nigin, taka ĩ od fire nem wogõ yef, ĩ tamo to wogõ fiyēdif, anĩ ere, ĩ Negur wogõ fiyek. Are, taka nem in od to keleĩ youf. ĩ Awa Uur bunem Negur nĒ waa wogõ yef. <sup>3</sup> Anĩ ere, taka ĩ profet od wogõ yef, ĩ tamo megeir ifenēdiyof nigin, waud yalesauf nigin ado, waud yo fouf nigin wogõ fiyēdif. <sup>4</sup> Taka ĩ od fire nem wogõ yef, ĩ yogo dogol isennek, anĩ ere, taka ĩ profet od wogõ yef, ĩ sios isennek. <sup>5</sup> Aya ā ganan od fire fire nem wogõ gouf nigin orouf, anĩ ere, aya ā profet od wogõ gouf nigin orouf bagai. Taka ĩ od fire nem wogõ yef, ĩ sios isennēf nigin taka nem yogon od to falei fouf are, taka ĩ profet od wogõ yef anim, taka ĩ od fire nem wogõ yef anĩ wal fiya.

<sup>6</sup> Turau tar, aya ā gein asi fen, od fire nem wogõ auf sain bun, aya kurõ fesiya od tunĩ, keleĩ, profet od be, faded fiya nĒ od, ā bun to arou asiyof are, ere biya aya ā afeneif? <sup>7</sup> Ere idi mata sã aitedif, digē be gita age fiya, idi ailõ fire fire to dinouf are, naig fe di, taka nem ere seg kodē def anĩ keleĩ youf? <sup>8</sup> Takag, taur ait tutuk to wõ youf are, aim kusĩ nigin dodok fouf? <sup>9</sup> Āg age fiya. Ā, āgenei baleim od fire nem yaor to wogõ gouf are, taka ĩ naig fe fen, ā

wogõ gef anĩ keleĩ youf? ã ege od yau bun urarãgouf dogol. <sup>10</sup> Tenebur ein od fire fire musei dibodok, anĩ ere, idi gariya sã taka to ibodok. <sup>11</sup> Aya ereb taka nem wogõ yef, anĩ nẽ gariya to keleĩ youf are, aya wogõ yef anĩ nẽ yaũ tamo, age fe di, ã aya bun yaũ tamo. <sup>12</sup> ãg age fiya. ã Awa Uur nẽ ege luwa yaleya nigin kabĩ totol walegedig, anĩ nigin, sios isennẽya nẽ ege luwa yaleya nigin kabĩ totol walogouf.

<sup>13</sup> Age fiya nigin, taka ã od fire nem wogõ yef, ã ereb wogõ yef anĩ falei foug nigin kosẽ youf. <sup>14</sup> Ere nigin, aya od fire nem kosẽ auf are, neu uur kosẽ yef, anĩ ere, neu kisi faat yũya sã. <sup>15</sup> Anĩ nigin, aya naig afouf? Aya neu uur bun kosẽ auf, anĩ ere, aya neu kisi buneg kosẽ auf. Aya neu uur bun seg alouf, anĩ ere, aya neu kisi buneg seg alouf. <sup>16</sup> Õ ogon uur bun Negur yana walesauf are, taka ã idi anĩ to keleĩ anidi atun ibodok, ã ereb õ urok anĩ keleĩ sã nigin, naig fe fen, ã ogon de fiyẽya bun “Momoi” youf? <sup>17</sup> Õ ogon de fiya are biya bagai, anĩ ere, taka to usennek.

<sup>18</sup> Aya ã ganan wal yeĩya, od fire nem wogõ auf nigin Negur de afiyek. <sup>19</sup> Anĩ ere, sios bun, aya ten tausen od od fire nem wogõya anĩ fotokar, tunĩ tai fediya nigin od faif bun yaor wogõ auf anĩ orouf.

<sup>20</sup> Turau tar, ãgenei kisi bun simõ gen to ufareg. Sane nigin, momou nẽ kisi gen ufareg, anĩ ere, ãgenei kisi bun biyeĩ ufareg. <sup>21</sup> Lo bun eig ye itoton:

Odug irok,

“Tamo od fire nem wogõ def anidi bunem ado,

yaũ tamo sigoreid bunem,

aya tamo kayau eneidi wogõ afediyouf,

anĩ ere, sain anĩ buneg idi aya to karĩ difiyauf.”\*

---

\* **14:21:** Asaia 28:11, 12

<sup>22</sup> Anĩ nigin, od fire nem wogõya are, momoiya tamo kayau bun uris sã, anĩ ere, momoiya sã tamo kayau bun uris. Anĩ ere, profet od wogõya are, momoiya tamo kayau bun, momoiya sã tamo kayau bun sã. <sup>23</sup> Anĩ nigin, sios guru fiya odug bun, tamo kayau ganan od fire nem wogõ de di, tunĩ anĩ keleĩ sã be, tunĩ momoiya sã disiyouf are, idi ã nigin wadã ideneik to douf de? <sup>24</sup> Anĩ ere, taka ã momoiya sã be, taka ã anĩ keleĩ sã, tamo kayau ganan profet od wogõ de mog, isiyouf are, ã tamo kayau ganan neid wogõya bunem ã mosor tamo ya anĩ kisi fokõ ye di, tamo kayau ganan ã es difiyẽf, <sup>25</sup> age dife di, yogon wau bun iminẽdig anĩ yaorouf. Anĩ nigin, ã kusureis fen, Negur yana yales, “Momoi bagai, Negur ã atun ibodok,” youf.

### *Negur Yana Suma Dõf Yaleseya*

<sup>26</sup> Anĩ nigin, turau tar, ada naig tafouf? Sain ã guru gef, ã ganan atun taka seg ado, taka faded fiya nẽ od ado, taka kurõ fesiya od ado, taka od fire nem wogõya be, od fire nem wogõya anĩ falei fiya adof. Anĩ ganan sios megeir fiya nigin ago gouf. <sup>27</sup> Taka ã od fire nem wogõ youf are, uru be, towom dogol age fiya sain dale fen, teke tekeleim wogõ douf. Age fe di, taka nem od fire nem wogõya anĩ falei fouf. <sup>28</sup> Od fire nem wogõya anĩ falei fiya tamo sãf are, wogõya tamo ã sios bun foro yel fen, yogo ado Negur bun wogõ youf.

<sup>29</sup> Profet uru be, towom age fiya wogõ douf, age de mog, tunĩ ganan, ereb wogõ yef anĩ el de es difouf. <sup>30</sup> Anĩ ere, idi guru fiya dibodok anidi atun, kurõ fesiya od taka, taka bun isiyouf are, uyu wogõ yef are dẽ yalauf. <sup>31</sup> Ere nigin, ã ganan sain waleg fen, teke tekeleim profet od wogõ gouf, anĩ bunem, ganan keleĩ dale fen, waud yalesauf. <sup>32</sup> Profet neid uur are profet dogo kulatun dife fen, dogo neid

wogōya sain bun dogol wogō douf. <sup>33</sup> Ere nigin, Negur ï ekul fiya nē Negur sã, ï wau inosiya nē Negur.

Tamo kayau fateul neid sios ganan bun age difedig gen, <sup>34</sup> kayau idi sios bun foro del difarauf. Idi wogōya nē modoũ to difenēdiyof, anĩ ere, idi Lo irok kilei, anĩ dō difouf. <sup>35</sup> Idi ereb taka nigin to fiya orodiyof are, idi neid fō bun dogo neid tamo to difediyof, ere nigin, kayau taka sios bun wogōya are mama ado.

<sup>36</sup> Negur nē od ã bunem gariya inon de? Od anĩ ã bun dogol isin de? <sup>37</sup> Taka ï kisif, ï profet taka be, ï Awa Uur nē ege luwa alen youf are, ï ereb aya atotkeneik are Odug nē ïtãfiya ya anĩ keleĩ youf. <sup>38</sup> Taka ï enei welebi foug are, ï yogo welebi fiyēf.

<sup>39</sup> Anĩ nigin, turau tar, profet od wogō gouf nigin kisi total walogouf. Agog fen, od fire nem wogōya nigin to katũ wiyēdigouf. <sup>40</sup> Anĩ ere, ereb ereb ganan suma bagai dōg fen, biya bagai ago gouf.

## 15

### *Kristus Nē* Mata Kel Fāya

<sup>1</sup> Turau tar, aya biya od wogō ayeĩ di, waleg fen, anĩ teten ufaregef anĩ, baban ã kisi turĩ ayeĩf nigin orouf. <sup>2</sup> ã od aya wogō ayein anĩ, uroug kafĩ waleg fen, ege to momoi gen ouf are, biya od enei bunem ã kel gei yeĩf.

<sup>3</sup> Ere nigin, ereb aya alen, are odug bagai nigin, uyulil anĩ aya ã afenein, are Kristus ï, Negur nē Itotoya bun yenek kilei, neda mosor nigin laa fe di, <sup>4</sup> ï mũ difen, are Negur nē Itotoya bun yenek kilei, naa towo bun ï mata kel fã yen, <sup>5</sup> are ï Pita bun wō ye fen, anĩ dumen in dō fiya tar tuwelf bun wō yen. <sup>6</sup> Anĩ bure fele di, ï sain tekelei bun tura tar faif hundred wal fiya meleid bun wō yen, anidi ganan musei fau dibodok, tunĩ gare den. <sup>7</sup> Agef fen, ï Jems mala bun wō yen, anĩ dumen aposel ganan meleid bun wō

yen. <sup>8</sup> Anĩ ganan bure fel fen, idikeleya bun, ĩ, aya kesu gō fiya sain sã bun gō difiyan gen anĩ, malau buneg wō yen.

<sup>9</sup> Ere nigin, aya aposel idi atun naal bagai, aya to biya nigin aposel yeya nigineg kisi feleya sã, ere nigin, aya Negur nē sios darau afenen. <sup>10</sup> Anĩ ere, Negur nē wau ifenēya bunem, aya gama afaref gen age wō aun. Aya bun yogon wau ifenēya anĩ ege to ilen. Sã, aya kabĩ total idi ganan wal fediya alen, are ayam sã, anĩ ere, Negur aya ado ibodon in wau ifenēya anim. <sup>11</sup> Age fiya nigin, ayam be, idim, amã enei wogō mauf, are ã enei momoi gen.

*Gare Den Tamo Neid Mata Kel Fãya*

<sup>12</sup> Amã Kristus gare den anidi bun tamal mata kel fã yen anĩ wogō maudig, anĩ ere, naig fe di, ã tunĩ, gare den anidi mata to ke de fã douf gedig? <sup>13</sup> Gare den anidi, mata to ke de fã douf are, Kristus ĩg mata to kel fã yem. <sup>14</sup> Kristus ĩ mata to kel fã yem are, nemã wogōya anĩ kaũ sã di, ãgenei momoiya areg kaũ sam. <sup>15</sup> Age fiyam are, amã Negur nigin idegēya od wogō maudig anĩ dilemam, ere nigin, amã Negur ĩ Kristus gare den anidi bun tamal turĩ fiyen anĩ kurō mafesidig. Anĩ ere, Negur ĩ gare den anidi to turĩ fediyouf anĩ momoi ouf are, ĩ Kristus to turĩ fiyem. <sup>16</sup> Ere nigin, Negur ĩ gare den anidi to turĩ fediyouf are, ĩ Kristuseg to turĩ fiyem. <sup>17</sup> Negur ĩ Kristus to turĩ fiyem are, ãgenei momoiya are ege, ã ãgenei mosor bun fau ubodōgef. <sup>18</sup> Age fiyam are, idi Kristus nigin momoi de fen, gare den anidig fō delem. <sup>19</sup> Ada ein mata ibodōya enei nigin dogol, Kristus bun wauda iseya adouf are, ada tamo ganan wal fediya maladalon ado.

<sup>20</sup> Anĩ ere, Kristus momoi bagai gare den anidi bun tamal kel turĩ fiyen, are idi gare den anidi bun tamal faat uyulil yun gen. <sup>21</sup> Are, laa are tamo tekelei bunem isin nigin, gare den neid kel fãya areg tamo tekelei bunem isif.

<sup>22</sup> Are, Adam bun ganan gare dedig, age fiya gen, Kristus bun ganan mata ifenēdiyof. <sup>23</sup> Anī ere, idi mugu mugu dogo neid sain bun age difouf: Kristus ī uyulil faat yūya, anī dumen, ī isiyof sain bun, idi yogon dibodok anidi, mata ke de fā douf. <sup>24</sup> Anī bure fele di, idikeleya sain isiyof, sain anī bun, Kristus ī gawaman ganan, yeneid ado ganan, megeir ganan daū fel fen, tano anī yale, Dei Negur ima bun inouf. <sup>25</sup> Ere nigin, ī king ibodok ile, yogon kiwai tar ganan yogo ye farumen inenēdiyof sain anī bun. <sup>26</sup> Kiwai idikeleya bun daū fiya nē, are laa. <sup>27</sup> Are Negur nē Itotoya bun eig ye irok kilei, “Negur ī ereb ereb ganan yogo ye farumen inenēdin.”\* Sain ī irok, are ereb ereb ganan ī farumen inenēdin, are Negur ī ereb ereb ganan Kristus farumen inenēdin, Negur ī yogo enei farumen to ibodok ya anī yaor. <sup>28</sup> Sain Negur ī enei age fel fen, Naal yogo, Negur ī ereb ereb ganan Kristus farumen inenēdin anī, farumen inenēf, anī bunem, Negur ī ereb ereb ganan nē mudur ibodōf.

<sup>29</sup> Mata kel fāya anī sāf are, idi tamo gare den anidi nigin naan dalef idi naig difouf? Tamo gare den anidi to bagai kel turī fediyof are, ere nigin tamo kayau idi nigin naan daledig? <sup>30</sup> Takag, amā nigin, ere nigin amā mug sain ganan bouwamā waila bun manenēdig? <sup>31</sup> Turau tar, aya ā neda Odug Kristus Jesus bun ubodōgef nigin, yanau alesedig anī bunem, momoi bagai enei total bagai arok, are aya naa ganan laa bun eledig. <sup>32</sup> Aya tamo nē kisi bunem dogol, Efesus oun gaar kuī geid kusī aun ouf are, ere mala biya anī aya alen? Tamo gare den anidi to kel turī fediyof are, Negur nē Itotoya bun yenek kilei, “Saaf ado naan tāf, ere nigin, nil gare tauf.”†

---

\* 15:27: Sam 8:6 † 15:32: Asaia 22:13



<sup>33</sup> ã taka nem to idegneif. “Sane geid nigal yūya bun, tobonunã biya daũ fedig.” <sup>34</sup> Kisi biya bun kel usig ufareg fen, mosor inoya utorög, ere nigin, ã atun tunĩ Negur nigin keleĩ sã difaref. Aya ã mama yeif nigin enei wogō auf.

*Kel Fāya Nē* Bouwa

<sup>35</sup> Anĩ ere, taka nem to fouf, “Tamo gare den anidi, naig fe kel turĩ fediyouf? Bouweid naig fiya bagai ado disiyouf?” <sup>36</sup> ã neneya bagai! Ereb õ tu wouf anĩ, to laa fouf are, anĩ mata to wō youf. <sup>37</sup> Sain õ tu wof, õ fau ibodōf nē bouwa anĩ to utenek, anĩ ere, wit be, erab taka nē faat dogol. <sup>38</sup> Anĩ ere, Negur ĩ oron kilei, bouwa ifenēdig, agef fen, ĩ faat fire fire dogo neid bouweid fire fire ifenēdidig. <sup>39</sup> Bouwa ganan tekelei sã. Tamo nē bouwa are fire, gaar bouwa fire, ninã bouwa fire, gau bouwa fire. <sup>40</sup> Saa ilun nē bouweid ado di, tenebur nē bouweideg ado. Anĩ ere, saa ilun nē bouweid fula fiya medeīya fire di, tenebur nē bouweid fula fiya medeīya areg fire. <sup>41</sup> Gaa are futu reya fire di, ogō are futu reya fire, age fe di, barisa are futu reya fire. Barisa idi atuneg futu reya fire fire ado.

<sup>42</sup> Age fiya gen, tamo gare den anidi neid mata kel fāya areg age fof. Bouwa tu fiya nē are bura le di, bouwa kel fā yef nē are to bura ledig. <sup>43</sup> Sane bun tu fiya di, fula fiya medeīya bun kel fā yef. Totol sã tu fiya di, totol ado kel fā yef. <sup>44</sup> Bouwa buru maug are tu fiya di, uur nē bouwa are kel fā yef.

Bouwa buru maug ibodok are, uur nē bouwag ibodok. <sup>45</sup> Anĩ nigin, Negur nē Itotoya bun eig ye irok, “Uyulil inon tamo Adam ĩ mata ibodōya wō yen.”<sup>‡</sup> Idikeleya Adam ĩ mata ifenēya nē uur wō yen. <sup>46</sup> Uur nē bouwa ketem to isin, anĩ ere, bouwa buru maug ketem isin. Age fe di, anĩ

---

<sup>‡</sup> 15:45: [Jenesis 2:7](#)

dumen, uur nē bouwa. <sup>47</sup> Uyulil inon tamo are tenebur aas nē, anī dō fiya tamo are saa ilun nē. <sup>48</sup> Tenebur nē tamo idi, tamo teneub nem inon gen. Saa ilun nē tamo idig, tamo saa ilun tamal gen. <sup>49</sup> Ada tenebur tamo inon age fiya tabodok gen, adag tamo saa ilun tamal age fiya tabodōf.

<sup>50</sup> Turau tar, aya ã arokeneik, are tenebur nē bouwam Negur nē tano to akorou youf. Ereb bura ledig anīg to bura lauf anī to akorou youf. <sup>51</sup> Karī wog, aya waa taka arokeneif: Ada ganan to gare tauf, anī ere, ada ganan bouwada falei fouf, <sup>52</sup> are ereb fili yeleya be, mala kamisāya gen idikeleya nē taur aitouf bun, bouwada agef falei fouf. Taur aite di, tamo gare den anidi kel turī fedī di, to buraya nē ado fā douf, age fe di, ada bouwada falei fouf. <sup>53</sup> Are, buraya nē anī to burauf nē anī ifonūf. Laa fiya nē anī to laa fouf nē anī ifonūf. <sup>54</sup> Buraya nē anī to burauf nē anī ifonūf, laa fiya nē anī to laa fouf nē anī ifonūf sain anī bun, Negur nē Itotoya bun ibodok enei agef kisi fel wō youf, “Negurem kusī bun laa wal fe fen, anī adok itob len.”§

<sup>55</sup> “O laa, ogon kusī wal fiya nē megeir nain?

O laa, ogon waila nain?”\*

<sup>56</sup> Laa nē waila are mosor, mosor nē megeir are lo. <sup>57</sup> Anī ere, Negur de tafiyēf! Ī neda Odug Jesus Kristus bunem kusī wal fiya ifanadadig.

<sup>58</sup> Anī nigin, neu turau tar oboiyou, total ufareg. Ereb takam to yokū yeif. Faimud Odug nē kabī fatuk bagai walogouf, ere nigin, ã keleĩ, are ã Odug bun kabī walegef anī, age to ilauf.

---

§ 15:54: Asaia 25:8 \* 15:55: Hosia 13:14

## 16

### *Negur Nē* Tamo Kayau Isennēdiya Nigin Kolekta

<sup>1</sup> Gama Negur nē tamo kayau isennēdiya nē kolekta nigin, ereb aya Galesia sios age difouf nigin arokenēdin anī ago gouf. <sup>2</sup> Uub ganan nē naa matu bun, ā mugu mugu, augeneĩ moni walegedig anī foig, fire unog fen, kuru gouf, anī bunem, sain aya asiyouf bun, kolekta baban to unogouf. <sup>3</sup> Sain aya wō auf, tamo ā ugirnēdigen anidi bun, pas afeneĩd fen, āgenei ege luwa ado Jerusalem sur afediyouf. <sup>4</sup> Ayag idi geid ileya nigin deuf are, idi aya geid weim malauf.

### *Pol Nē* Wau Irōya

<sup>5</sup> Aya Masedonia provins atu atu ele fen, ā gein asiyouf, ere nigin, aya Masedonia atu atu alauf. <sup>6</sup> Aya ā geid sain naal tabodōf be, yau ado menig sain bun ā geid tabodōf, anī bunem, ā neu iyōya nain be alauf bun usennagauf. <sup>7</sup> Aya gama ā ailiyei ken, sain naal ki yeīya anī to orouf. Odug yo youf are, aya sain naal meluk ā geid tabodōf anī wau irok. <sup>8</sup> Anī ere, aya Efesus ein abodok ele, Pentikos naa wō youf, <sup>9</sup> ere nigin, kabī kaū ado nē sukar odug, aya bun kā fen, age fe di, musei aya kiwai difanaf.

<sup>10</sup> Timoti isiyouf are, ĩ ā geid ibodōf bun, ĩ ereb taka nigin to kumī youf nigin lo welegei, ere nigin, ĩ aya gen Odug nē kabī faali fef. <sup>11</sup> Anī nigin, taka nem ĩ yaleya nigin to itorōf. Yogon delē bun wau inosiya ado sur wiyēge di, ĩ aya gein kel isiyouf. ĩ tura tar geid disiyouf nigin, aya ololo afedif.

<sup>12</sup> Neda turada Apolos nigin, ĩ tura tar geid ā gein dilauf nigin, aya total bagai arokenen. ĩ gama ileya nigin wau yenēya sã, anī ere, ĩ ileya nigin sain biya isiyouf are, ĩ ilauf.

<sup>13</sup> Lo welegei, momoiya bun total ufareg, tamo total ado kumĩ sã wõg, total waleg. <sup>14</sup> Ereb erab ganan wau laa fiya bun ago gouf.

<sup>15</sup> Ā keleĩ, are Stefanas nē ibor, Akaia provins oun uyulil momoiya tamo kayau wõ de fen, idi dogo neid oroya dõ de, Negur nē tamo kayau disennēdiyof nigin, kabĩ total daledig. Turau tar, aya total bagai arokeneik, <sup>16</sup> are ā eneidi age fediya ado, idi ganan kabĩ bun disi fen, kabĩ dalef anidi farumen ubodõg. <sup>17</sup> Sain Stefanas, Fotunatus ado, Akaiqus wõ den, aya wau al fen, ere nigin, erab ā bun tamal ifanamāya anĩ, idim ā fotokar difanamam. <sup>18</sup> Are, idi age dife di, neu uur ado āgeneig filolõ fen. Anĩ nigin, tamo age fediya nigin de fiyēdiya nē kisi walogouf.

#### *Idikeleya Nē Aanya*

<sup>19</sup> Asia provins bun sios idi, ā bun aanya sur difef. Akwila Prisila ado aanya, wau sere fiya ado Odug bunem ā bun sur difef. Sios idi neid fõ bun guru difedig idig age difef. <sup>20</sup> Ein tureĩ tar ganan ā bun aanya sur difef. Ā abob aan wiyēg fen, fateul bunem umã gouf.

<sup>21</sup> Aya, Pol imaum bagai aanya enei atotof.

<sup>22</sup> Taka ĩ Odug nigin wau to laa fouf are, isisīya ĩ bun isiyouf. O Odug, usi!

<sup>23</sup> Odug Jesus nē wau ifenēya, ā bun ibodõf.

<sup>24</sup> Neu wau laa fiya, Kristus Jesus bunem ā ganan bun ibodõf. Momoi.

**Mata Ifenēya Nē Od**  
**The New Testament in the Marik Language of Papua New Guinea**  
**Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

**The New Testament**

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

---

PDF generated using Haiola and XeLaTeX on 19 Oct 2021 from source files dated 20 May 2021

d7099f9d-3bdf-5620-8eb3-7e6c51cab7ea